

67

DEO OPTIMO MAXIMO  
UNI ET TRINO,

VIRGINI DEI-PARÆ, ET S. LUCÆ,  
Orthodoxorum Medicorum Patrono.

QUÆSTIO MEDICA,  
QUOD LIBETARIIS DISPUTATIONIBUS

manè discutienda in Scholis Medicorum, die Martis vigesima-septimā  
mensis Februarii, anno Domini M. DCC. LXX.

M. JOANNE -BAPTISTA-FRANCISCO DE LA  
RIVIERE, Consiliario Medico Regis ordinario  
in ejus Castelleto, Doctore Medico Præside.

*An suppressis menstribus varia, pro variis symptomatibus, instituenda venæ sectio?*

I.



UPPRESSO sanguinis menstrualis effluvio plurimi nascuntur morbi miseris ægrotantibus immaturam mortem citò citius accersuri, nisi præsentissimum illis auxilium Medicus admoveat. Venæ sectiones ad illorum curationem felicissimo cum successu usurpandæ veniunt: at an è brachio, an è saphenâ sanguis detrahendus? Torus in eo vertitur doctrinæ cardo. Sanguinis ab utero devii promptissimam in illius vasa derivationem operandi gratiâ, saphenæ sectionem celebrabant antiqui: quæ quidem methodus illorum vota sæpè sæpius adimplebat. Attamen ex ipso-met *Riverii* tempore saphenæ sectionis in quibusdam circumstantiis inefficacitatem, imò & periculum, brachiique venam prius, postea malleoli aliquoties secandam esse jam jam agnoverant Medici. (a) Nostis autem temporibus quidam sunt, Medicorum nomine, nescio quâ sorte, gaudentes qui sese de numero, quocumque modo, excerpenti cupientes, venarum brachii sectionem, magno ægrotantium damno, semper & unicè præcipiunt. Quantum à recto tramite aberrant, innumeris facilè comprobaretur exemplis! Unum duntaxat è multis eligemus. Virgo quædam sanguineâ indole donata, menstribus fluentibus propè fontem sedens, gravissima suppressionis incommoda perpessa fuit. Medicus accersitus, novitatis amore supradictorum vestigia premens, sanguinem è brachio detrachere, linteaque aquâ frigidissimâ madentia suprà infimum ventrem apponere jussit. Ingens cruoris copia istius venæ sectionis ope in pulmones affluxit; illius in uteri vasa redivit linteorum applicatione præpeditus fuit, puellæque atroces coactæ mortis dolores experiens, intrâ tres horas suffocata periit. Quam igitur deploranda hujusce sæculi muliercularum fors quæ adeò inconsultè confugiunt ad illos quorum fluxa famæ gloria ephemero tantum splendore nitet! Sed horum-cc. pseudo-Medicorum æterni dedecoris cura illos-met ipsos maneat.

Varias sanguinis missiones diversos elicere effectus, suppressisque menstribus brachii malleolique venam, uno ferè tempore, aliquoties aperendam esse, ratio- cinio & experienciâ suffulti, demonstrare nostri est instituti.

(a) Ut patet è *Riverii* operibus. Cent. I. Obs. II. de quâ infra dicemus.

**P**ERIODICUS mensium effluxus ad feminarum sanitatem aded confert ut plerique hujus-ce sexûs morbi ab illius suppressione pendeant. Sanguis superfluus ex utero, singulo mense, prorumpens, in illius valis, quâ de causâ, retentus, diversas ac plûs minûs-vê luctuosas in œconomiâ animali tragœdias agit, pro majori minori-vê diversarum quas exindè appellit partium momento. Verum enim verò suppressis mensibus infinium ventrem obident molesta circâ regionem uteri gravitas, tormina circâ umbilicum, spasticæ canalis intestinalis coarctationes, dolores lumbares acutissimi, Nephritis, suffocationes cardialgicæ; nausea vomitusque cruentus. Thoracem lacessunt præcordiorum angustia, dyspnœa, cordis palpitaciones, pleuritis spuria, pulmonum infarctus, hæmoptysis & asthma siccum. Capiti imminet vertigines pertimescendæ, narium hemorrhagiæ effrenes, sanguinis-vê in cerebrum congestiones, undè pertinaces exoriuntur cephalalgia, cruoris extravasatio variis abscessibus ansam præbens, aliaque benè multa pessimi ominis in cerebro accidentia. Membra lassitudine spasmi que laborant. Erysipelate & ulceribus mali moris universum corpus afficitur. Ad hæc omnia obstructiones à sanguine in diversis partibus stagnante & inflammationes ab illis oriundæ quæ mirum in modum ægrotantes excruciant. Tempore quo fluunt menses, animi pathemata vel levissima, læticia, mæror, iracundia, timor; potus aquæ frigidæ ac imprimis dùm æstuat corpus, acidorum & adstringentium abusus, incauta pediluvia & alia complura externè adhibita, salutarem hanc evacuationem sistere possunt. Quoad causas internas Plethora, sanguinis spissitudo, motus segnior, uteri vasorum imbecillitas aut ultra tonum extensio, eundem adhuc eliciunt effectum. Singula verò quæ menses compescere valent enarrare longius & à proposito alienum.

Tam diversorum affectuum qui suppressis mensibus succedunt mox delineatam effigiem attentè perpendenti, varias sanguinis missiones pro variis morbi symptomatibus instituendas esse jam jam abundè patebit. Sed ut quæstionis nostræ veritas clariori luce resurgat, de sanguinis derivatione ac revulsione, secutâ cubiti aut malleoli venâ, pauca dicere juvat & expedit.

III.

**I**N quâlibet sanguinis missione tria rationum momenta consideranda veniunt. 1°. Apertâ venâ minuitur quantitas sanguinis è variis corporis partibus ad cor redeuntis; pariter ergo minuitur volumen illius qui pulsus à corde hæc-ce partes appellit. Hinc vasa vacuantur & exonerantur, solidorum actio vividior evadit, sanguis vegetior fluit, referantur obstructiones sananturque inflammationes è quibus natales ducunt. Tales sunt in genere sanguinis missionum effectus. 2°. Mediante venæ aperturâ sanguis breviorē facilioremque viam habens, juxta certiores hydrostaticæ regulas versus venam apertam abundantius fluit, in hunc locum necessariò majori copiâ derivatur. 3°. Denique sanguis in unam partem copiosius affluere non potest quin eadem quantitate revellatur è partibus remotis & oppositis. Omnes ergo venæ sectiones quamdam cruoris copiam evacuant, ac sub diverso respectu & relative ad diversas corporis partes sanguinis derivationem unâ & revulsionem operantur. Secutâ enim v. g. malleoli venâ tunc sanguinî saphenam appellenti resistentia sit minor; fluidum illud abundantius derivatur in singulas partes quæ ex aortâ inferiori suum sanguinem accipiunt: undè facile videre est saphenæ sectionem nedum tollat obstructionem cujuslibet visceris in

abdomine; eam potius adaugere, si quidem illius ope sanguis magis ac magis in infimo ventre coacervatur. Attamen hic annotandum est levem duntaxat obstructionis in utero gradum sæpe sapius malleoli venæ sectione tolli; quod rationi haud dubiè consonat: minorem enim resistantiam à novo validiorique cruoris appulsu superari non mirum. At derivatus sanguis fortiori obicem impar vincendo, partes gradu maximè intenso obstructas onerat insuper, jàmque evidentissimum vasorum dilacerationis, aut inflammationis doloribus atrocissimis stipatæ lethalisque gangrænæ periculum instat. Abdominis igitur viscere quodam intense obstructo saphenæ sectiones admodum nocivas esse nemo sanè Medicus inficiàs ibit. Contrà verò apertâ cubiti venâ sanguis ex abdomine revellitur, derivatur in omnes partes ab aortâ superiori irrigatas, ac eâdem proportionem exonerantur illæ quas inferior alluit. Partium inferiorum vasa, sic à sanguine nimio circulationis motum præpediente exonerata, in liquidum intrâ illorum cava remanentem liberius ac vividius agunt, hunc pellunt ulterius: circulatio de novo viget, tolliturque morbus abdomen exerucians, qui quidem ex eâdem indole morbus in cerebrum, exempli causâ, sedens, tali venæ sectione, magno cum vitæ periculo, recrudesceret.

## I V.

**H**IS præmissis faciliè dignoscetur cur & quando suppressis menstruis alterutra sanguinis missio sit instituenda. Saphenæ sectio ab antiquis celebrata optimè conducit dum levis, ut jam diximus, in uteri vasis obstructio, sanguini derivanti faciliè cedens, mitiora tantum symptomata parit. Non minori ægro tantum commodò præscribitur dum sanguis ab utero devius versùs quasdam partes ab aortâ superiori irrigatas refluit: necessaria evadit si sanguis ille in cerebrum affluens, vertigines, meningum inflammationem, delirium aliaque teterrima mala producit. At licet saphenæ sectio veterum praxi commendetur, licet feliciores aliquandò exerat effectus; plurimi tamen casus occurrunt in quibus ex illâ sanguinis missione, si sola adhibeatur, gravissima sequuntur incommoda. Ad aliam igitur recurrendum est methodum certioribus de sanguinis derivatione & revulsione mox positis principis innixam. Suppressione enim menstruis à nimio sanguine uteri vasa ultrâ tonum distendente, ut pluries accidit, saphenam secando malum adaugeri necessum est. Brachii è contrà venam priùs aperiendo, revellitur ex utero sanguis, illius vasa deplentur, systolicam quâ gaudent actionem exercere valent, uno verbo tollitur obstaculum; posteaquè saphenam secando, sanguis in uteri vasa derivans nullum ampliùs impedimentum reperiens, capillarium ad extremitates usque pervenit, solitisque viis foràs erumpit. Observatio sequens è Riverii operibus deprompta sanguinem tum è brachio, tum è saphenâ in illo casu detrahendum esse apprime demonstrat. *Mulier quædam externa sanguineo temperamento donata varios affectus patiebatur à mensium suppressione præcipuè oriundus. . . . Petitum est consilium à Medicis Monspelienfibus per litteras. In relatione autem hoc imprimis notaverant Medici ordinarii de quo impensè mirabantur & sibi rationem reddi postulabant; quod nimirum quoties secabatur vena malleoli menstrua cohiberentur, dum verò è venâ brachii sanguis mittebatur; ea largiùs, profluerent. . . . Cum enim illa mulier plethorica esset, ac suppressionem mensium pateretur à nimia sanguinis copiâ, uteri vasa itâ distendente ut comprimi sufficerent non valerent; attracto sanguine ad ea vasa per venarum inferiorum apertionem, augebatur obstructio. . . . Idè monebantur Medici præsentés, ut largâ phlebotomiâ*

*in brachio celebratâ plethoram imminuerent : postea verò apertis venis inferioribus sanguinem ad inferiora retraherint. . . . Quod olim suadebat Riverius, recentiorum melioris notæ Medicorum quotidianâ praxi comprobatur. Cubiti venâ penè secatâ sanguinem decerpent ex uteri vasis manantem aliquoties ego-met ipse vidi. Ex istâ sanguinis missione Medicus talem effectum non sibi promittit. Sed utri vasis revulsionis ope depletis, plethoræ medetur, obstructionem tollit, ac denique saphenæ sectionem præcipiendo, sanguinis menstrualis effluvium antea cohibitum hac-ce ingeniosâ methodo provocat & restituit.*

V.

**O**BJICIENT forsân antiquorum praxis fautores saphenam tantùm apertendam esse, etiâ dùm cohibentur menses à nimîâ sanguinis copiâ uterî vasa obstruente; si quid-â sanguis saphenæ sectione in illa derivans, ea itâ onerat ut tandem dilacerentur: disruptis vasis sanguis ex illis stillat exoptatusque ad hunc modum restituitur mensium effluxus. Sed ut peracutos dolores ex tali methodo oriundos sileamus; quodnam erit certum hujus-ce futuræ dilacerationis indicium? Quis unquâ, vasa si reluctantur, vehementissimæ inflammationis nullis sedandæ remediis, imminentsque gangrenæ periculo non commovebitur? Quibusdam rationum momentis si fulciri posset ridicula hæc opinio in Medicinâ novatorum qui suppressis mensibus, ut ut sint morbi symptomata, brachii venæ sectionem semper præcipiunt, in illis propugnandis libenter immoremur. Artis verò sanioribus regulis addo adversatur hæc insaufa methodus, ut non nisi imperitis aut iis qui de ægotantium salute parùm solliciti, quoquo pretio nomen sibi comparare cupiunt, adhiberi queat. Nobis autem cum in votis est rationi ac præsertim experientiæ unicè mancipari, saphenam quandoquæ, suppressis mensibus, secandam esse; uterî verò vasis intensè obstructis sanguinem è brachio priùs, postea è malleoli venâ citò citiùs mittendum esse contendimus sequentique conclusioni adhæremus.

*Ergò suppressis menstruis varia, pro variis symptomatibus, instituenda venæ sectio?*

DOMINI DOCTORES DISPUTATURI.

- |   |   |  |
|---|---|--|
| <i>M. Ludovicus-Alexander CEZAN.</i>                                    | <i>M. Carolus-Nicolaus DESLON.</i>                    | <i>M. Stephanus POURFOUR DU PETIT.</i>                 |
| <i>M. Joannes-Baptista LANCLOIS, Rei herbariæ Professor designatus.</i> | <i>M. Antonius Joannes-Baptista Maclovius GUENET.</i> | <i>M. Paschasius BORIE.</i>                            |
| <i>M. Henricus RAYMOND.</i>   | <i>M. Paulus-Gabriel LE PREVEX.</i>                   | <i>M. Florentius-Carolus BELLOT, Professor Regius.</i> |

Proponerebat Parisiis BENJAMINUS-MICHAEL SOLIER DE LA ROMILLAIS;  
Rhedonxus apud Armoricos Doctor Medicus Remensis, nec-non saluberrimæ  
Facultatis Medicinæ Parisiensis Baccalaureus, Theſeos Autor.  
A. R. S. H. 1770.